

中国古典精华文库

全宋词

第七部

姜个翁

霓裳中序第一（春晚旅寓）

园林罢组织。树树东风翠云滴。草满旧家行迹。是鼓舞得声声，晓莺如觅。愁红半湿。煞憔悴、墙根堪惜。可念我，飘零如此，一地送岑寂。

龟石。当年第一。也似老、人间风日。余葩选甚颜色。羞捻江南，断肠词笔。留春浑未得。翻些入、啼鹃夜泣。清江晚，绿杨归思，隔岸数峰出。

彭芳远

满江红（风前断笛平韵）

愁满关山，又吹得、芦花雪深。西楼外、天低水涌，龙挟秋吟。回首人间无此曲，数峰江上落余音。似断云、飞絮两悠悠，何处寻。

江南路，晴又阴，声韵改，泪盈襟。自中郎去后，羽泛商沈。牛背斜阳添别恨，鸾胶秋月续琴心。待醉骑、黄鹤度苍寒，霜满林。

戴山隐

满江红（风前断笛）

醉倚江楼，长空外、行云遥驻。甚凄凉孤吹，含商引羽。薄夜冷侵沙浦雁，老龙吟彻寒潭雨。暮凉飏、一阵卷潮来，惊飞去。

重欲听，知何处。谁为我，胡床据。谩寻寻觅觅，凝情如许。旧日山阳空有恨，杏花明月今谁赋。恐凭阑、人有爱梅心，空愁伫。

李裕翁

摸鱼儿（春光）

计江南、许多风景，繁华只在晴昼。些儿淡沲花著柳。疏雨。更艳艳绵绵，泼眼浓如酒。飞浮宇宙。但借日浮香，随烟著物，巧笔画难就。

惆怅处，曾记苏堤携手。十年惊觉回首。苍埃霁景成阴晦，湖水湖烟依旧。凝望久。问燕燕莺莺，识此年花否。长门别有。脉脉断肠人，柔情荡漾，长是为伊瘦。

龙端是

忆旧游（题南楼）

问南楼月色，十载相疏，何似今宵。旧雨菰蒲国，想波光雁影，远撼沅潇。拟苏堤上柳，烟碧为谁摇。叹庾扇尘深，胡床梦浅，翠减香销。

迢迢。谩回首，记酹酒江山，曾共金镳。暮色沈西垒，几狂朋来往，舟叶招招。浩歌拍手归去，风月两长桥。算此会何时，刘郎去后多嫩桃。

萧东父

齐天乐

扇鸾收影惊秋晚，梧桐又供疏雨。翠箔凉多，绣囊香减，陡觉簟冰如许。温存谁与。更禁得荒苔，露蛩相诉。恨结愁萦，风刀难翦几千缕。

闲思前事易远，怅旧欢无据，月堕湘浦。软玉分裯，腻云侵枕，犹忆喷兰低语。如今最苦。甚怕见灯昏，梦游间阻。怨杀娇痴，绿窗还嚏否。

王从叔

昭君怨

门外春风几度。马上行人何处。休更卷朱帘。草连天。
立尽海棠花月。飞到茶臼香雪。莫怪梦难成。梦无凭。

阮郎归

风中柳絮水中萍。聚散两无情。斜阳路上短长亭。今朝第
几程。

何限事，可怜生。能消几度春。别时言语总伤心。何曾一
字真。

南柯子（苦雨）

碧树留云湿，青山似笠低。鹧鸪啼罢竹难啼。不晓天天何
意、要梅肥。

昨日穿新葛，今朝御夹衣，思家怀抱政难为。只恐归来憔

悴、却羞归。

浣溪沙（梅）

水月精神玉雪胎。乾坤清气化生来。断桥流水领春回。
昨夜醉眠苔上石，天香冉冉下瑶台。起来窗外见花开。

秋蕊香（用清真韵）

薄薄罗衣乍暖，红入酒痕潮面。絮花舞倦带娇眼。昨夜平
堤水浅。

故人信断风筝线。误归燕。梦魂不怕山路远。无奈棋声隔
院。

吴元可

凤凰台上忆吹箫（秋意）

更不成愁，何曾是醉，豆花雨后轻阴。似此心情自可，多了闲吟。秋在西楼西畔，秋较浅、不似情深。

夜来月，为谁瘦小，尘镜羞临。

弹箏，旧家伴侣，记雁啼秋水，下指成音。听未稳、当时自误，又况如今。那是柔肠易断，人间事、独此难禁。雕笼近，数声别似春禽。

扬州慢（初秋）

露叶犹青，岩药迟动，幽幽未似秋阴。似梅风带溽，吹度长林。记当日、西廊共月，小屏轻扇，人语凉深。对清觞，醉笑醒颦，何似如今。

临高欲赋，甚年来、渐减狂心。为谁倚多才，难凭易感，早付销沈。解事张郎风致，鲈鱼好、归听吴音。又夜阑闻笛，故人忽到幽襟。

采桑子（春夜）

江南二月春深浅，芳草青时，燕子来迟。翦翦轻寒不满衣。
清宵欲寐还无寐，顾影颦眉。整带心思。一样东风两样吹。

浪淘沙

浅约未曾来。一迳苍苔。绀桃无数棘花开。怪得闭门机杼
静，挑菜初回。

幽树鸟声催。欲去徘徊。□□别久易相猜。幽绪一晴无处
著，戏打青梅。

李太古

永遇乐

玉砌标鲜，雪园风致，似曾相识。蝉锦霞香，乌丝云湿，吹渴蟾蜍滴。青青白白，关关滑滑，寒损珠衣狂客。尽声声、不如归去，归也怎生归得。

含桃红小，香芹翠软，惆怅宜城山色。百折浮岚，几湾流水，那一些儿直。落花情味，露花魂梦，蒲花消息。抚纤眉，织乌西下，为君凝碧。

恋绣衾

橘花风信满院香。摘青梅、犹自怕尝。向绿密、红疏处，喜相逢、飞下一双。

堪怜堪惜还堪爱，唤青衣、推上绣窗。暗记得、凭肩语，对菱花、啼损晚妆。

南歌子

月下秦淮海，花前晏小山。二仙仙去几时还。留得月魂花魄、在人间。河汉流旌节，天风裊佩环。满空香雾湿云鬟。何处一声横笛、杏花寒。

虞美人

西风海色秋无际。双泪如铅水。白羊成队梦初平。挂杖敲云、云处晓鸿惊。

小琼闲抱银筝笑。问有芳卿否。玉书分付莫开封。明日人间临水、拾流红。

卜算子（梦中作）

尽道是伤春，不似悲秋怨。门外分明见远山，人不见，空肠断。

朝来一霎晴，薄暮西风远。却忆黄花小雨声，误落下、三四点。

黄子行

西湖月（自度商调）

湖光冷浸玻璃，荡一饷薰风，小舟如叶。藕花十丈，云梳雾洗，翠娇红怯。壶觞围坐处，正酒醪吹波红映颊。尚记得、玉臂生凉，不放汗香轻浹。

滯人小摘墙榴，为碎掐猩红，细认裙褶。旧游如梦，新愁似织，泪珠盈睫。秋娘风味在，怎得对银缸生笑靥。消瘦沈约诗腰，仿佛堪捻。

西湖月（探梅）

初弦月挂林梢，又一番西园，探梅消息。粉墙朱户，苔枝露蕊，淡匀轻饰。玉儿应有恨，为怅望东昏相记忆。便解佩、飞入云阶，长伴此花倾国。

诗腰瘦损刘郎，记立马攀条，倚阑横笛。少年风味，拈花弄蕊，爱香怜色。扬州何逊在，试点染吟笺留醉墨。谩赢得、疏影寒窗，夜深孤寂。

贺新郎（冰簟）

开遍寒梅萼。正东皇、排酥砌玉，幻成楼阁。十万琼裾仙女队，来趁春光游乐。向醉里、玉簪轻落。零乱不知何处去，甚人间、一夜东风恶。吹起在，画檐角。

参差向晓森如削。似吴姬、妆残粉指，向人垂著。好似西园笋瘦，红锦裯儿乍剥。且莫遣、儿童敲却。拟办羔儿香瓮酒，唤刘叉、来醉尊前约。吟好句，再描摸。

满江红

（归自湖南题富春馆）

津鼓匆匆，犹记得、故人相送。春江上、鸟啼花影，马嘶香鞚。情逐阳关金缕断，泪和杨柳春丝重。算别来、几度月明时，相思梦。

山万叠，愁眉耸。春一点，归心动。问风俦月侣，有谁游从。百里家山明日到，一尊芳酒今宵共。任楼头、吹尽五更风，梅花弄。

花心动（落梅）

谁倚青楼，把谪仙长笛，数声吹裂。一片乍零，千点还飞，正是雨晴时节。水晶帘外东风起，卷不尽、满庭香雪。画阑小，斜铺乱贴，翠苔成缬。

袅袅余香未歇。空怅望音尘，两眉愁切。翠袖泪干，粉额
妆寒，此恨有谁同说。江南春信无痕迹，余情在、冷烟残月。
梦魂远，兰灯伴人易灭。

小重山

一点斜阳红欲滴。白鸥飞不尽，楚天碧。渔歌声断晚风急。
搅芦花，飞雪满林湿。

孤馆百尤集。家山千里远，梦难觅。江湖风月好休拾。故
溪云，深处著蓑笠。

龙紫蓬

齐天乐（题滕王阁）

雨帘云栋重寻处，青红半空飞去。槛影侵鸥，檐光送雁，摇荡秋容千里。歌珠舞翠。怎禁得无情，一江流水。可是西山，半眉新绿向人觑。

千年留下胜赏，尽登临无限，须付才思。坏堞闲愁，危檣往恨，欲拍阑干无路。新碑旧记。更今古匆匆，一番兴废。立尽斜阳，共谁评半语。